

Dithero tsa Tirelano mo Kutlwanong

44/2015 Thero ka Sontaga wa 12 morago ga moletlo wa Borarobongwe, e le ka 23. 08. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, le kwadilwe mo go Jes. 42:3a, le re: **"Ga a kitla a roba lotlhaka lo lo pšhwetlegileng; ga a kitla a tima mogala wa lobone o o takatakang."**

1. Sefela sa 21- 21/ -

2. Thapelo: Morena wa rona o mogolo, o thata e kgolo; tlhaloganyo ya gagwe ga e ka ke ya lekanngwa. Pes. 147:5. Amen.

3. Lefoko la Testamente e kgologolo le kwadilwe mo go Jes. 29:17-24;

Epistolo ka fa thulaganyong ya 2 e kwadilwe mo go Ditiro 9:1-20;

Efangele ka fa thulaganyong ya 5 e kwadilwe mo go Mareko 8:22-26.

4. A go ipolelwe tumelo ya bokeresete!

5. Sefela sa 221 - 206/215

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Mareko 7:31-37, e re: "E rile a sena go tswa mo dinageng tsa Tiro le Sitone, a fitlha kwa letsheng la Galelea, mo gare ga dinaga tsa Dekapoli. Foo ba tsisa kwa go ene motho wa sesusu yo o gweletlhang; ba mo rapela gore a mmee seatla. Ya re a sena go mo ntsha mo bontsing, a mo isa fa thoko, a tsenya menwana ya gagwe mo ditsebeng tsa gagwe, a kgwa mathe, a ama loleme lwa gagwe a lelala kwa legodimong, a fegelwa, a mo raya a re: "Efatha!" Ke go re: "Kabologa." Ditsebe tsa gagwe tsa kabologa ka bonako, le thapo ya loleme lwa gagwe ya funologa, a ba a bua sentle. Jaanong a ba laela gore ba se ka ba bolelela ope; mme le fa a ba laetse thata, bone ba ya ba bolela bogolo thata. Ba gakgamala thata ba re: 'O dirile tsotlhe sentle; o utlwisisa disuse, o buisa dimumu.'" Amen.

8. Thero: Barategi mo Moreneng wa rona Jesu Keresete, ka letatsi lengwe Jesu o ne a raya barutwa ba ga Johane, a re: "Tsamayang, lo bolelele Johane tse lo di utlwang le tse lo di

bonang. Difofu di a bona, batlhotsi ba a tsamaya, balepero ba a phepafadiwa, disusu di a utlwa, baswi ba ba tsosiwa, bahumanegi ba rerelwa Efangele. Mme go sego yo o sa kgopisiweng ke nna,” Math. 11:4-6. A go itsiwe gore re direla Morena yo o nang le thata, yo e leng Mofenyi wa dintsho tsotlhe, maso otlhe, bogolo ke Mofenyi wa boleo, gonne ke jona bolwetse jo bo bolayang, ke botlhole mo botshelong jwa rona jwa semowa, jo bo bo bolayang. Phuthego, Jesu o utlwa go kopa, le go lopa ga rona. Lefoko la thero ya kajeno le re: “ba tsisa kwa go Jesu motho wa sesusu yo o gweletlheng; ba mo rapela gore a mmele seatla.” Batho bale ba ne ba rapela Jesu gore a ba thuse mo matsapeng a ba lebaganyeng le ona ka ntlha ya motho wa ga gabo yo e neng le motho wa sesusu yo o neng a gweletlha, e le yo o neng a sa utlwe lentswe, le e seng go bua lefoko le le utlwalang. Ke gona ka moo Jesu a utlwileng kopo ya bone, a utlwa selelo sa bone.

Phuthego e ntle mo Moreneng, Jesu ga a kgetholola batho ka sefatlhego sa bona, le fa o le Lezulu, Lejeremane, Moindia, Leburu, le jj. Mme o utlwa dikopo le dithapelo tsa batho botlhe ba ba mo rapelang. Ee, Modimo Rara wa rona mo legodimong o mo godimo ga tsotlhe, ke ene a le esi yo o nonofileng go re thusa tota., bogolo ka go re femela gore re se fetoge go nna disusu tse di sa tlholeng di utlwa Lefoko la Modimo, le go re femela mo go bone ba ba gweletlheng ka go le tlhakatlhakanya, le go re femela mo go ba ba lelang go re fofatsa gore re se tlhole re bona lorato lwa Modimo lo re lo senoletsweng ka ditsholofetso tse di kopantsweng le kolobetso ka metsi mo leineng la Modimo o e leng Rara le Morwa le Mowa o o Boitshepo, le selalelo sa mmele le madi a ga Jesu Keresete a re a tshologelelwang go itshwarelwa dibe. Modimo wa nnete ke ona o e leng Rara wa rona tota, rona re bana ba ona tota ka go kolobediwa mo leineng la Modimo o o Borarobongwe. A re kopeng mo go ona ka bopelokgale le ka boikanyo jotlhe jaaka bana ba ba rategang ba ba kopang rraabo yo o rategang.

Go thata mo lefatsheng go kopa motho gore a go thuse. Mo lefatsheng le re tshelang mo go lona, go na le selotlele sa go tumolola molomo wa motho, e bong madi. Fa o se na sepe, ga o thusiwe; mo tseleng, fa o tsamaya ka motorokara, o emiswa ke lephodisa, le tlhotlhobe motorokara, le batle ditogamaano tsotlhe, fa go na le e le nngwe fela e e sa siamang, le tla go itsise, gongwe le re: Latlha fa fatshe gore ke se go kwalele thekethe. Ke fa go diragala, le fa o ka le kopa, le go lela fa pele ga lona, fa go sa thuse sepe. Mme mo Modimong re dumeletswe go ithapelela mo go ona gore o re utlwe ka go re utlwela botlhoko. Fa o le tlalelong, o tlhoka

motho yo o nonofileng go go thusa. Jesu o ne a ba thusa, o thusitse motho yole yo o neng a le mo tlalelong e kgolo, a mo thusa ka go nonofisa go utlwa, le go bua sentle. A tsenya menwana ya gagwe mo ditsebeng tsa yo o neng a sa utlwe, a kgwa mathe, a ama loleme lwa yo o neng a sa bue, a fetola botshelo jwa gagwe. Motho yole o ne a tshediswa, a fiwa ditsebe go utlwa lefoko la Modimo, a fiwa molomo go bua lefoko la Modimo, a boka ditiro tse dikgolo tsa Modimo.

Phuthego, a re tlhokomeleng le se sengwe sa gore go na batho ba ba leofang, ba tlogela tumelo, ba re: "Modimo ga o nke o ba utlwela, a itshwarele maleo a a tshwanang le a bone. Go ka diragala, fa o ne wa tlalelwa mo go kalo, wa leka, wa ipotse, gore a nna ke ka rapela Modimo? Morago a o ne wa latlhegelwa ke tsholofelo? Kajeno o laelwa sešwa, le go lalediwa ke Morena gore o boele mo Modimong, o gopole, o ikanye gore Jesu o a re utlwa, fa re rapela, fa re mo kopa ka go mo ikanya. Ka go lebelela mo go Jesu yo o mo legodimong, le go utlwa tsholofetso ya gagwe, fa a nnela ruri le barutwa ba gagwe, re lalediwa go dumela, le go ikanya gore thuso ya rona e tswa teng. Jesu o nonofile go re fetola, gore re tshele. Dilo tsotlhe di ka baakanngwa ke Jesu. Ba ba neng ba na le lepero ba a phepafadiwa. Baleofi ba a itshwarelwa, ba itshekisiwa ka madi a gagwe. A re gopoleng le mohumagadi yole yo o neng a tshwarwa mo boakeng, le go emisiwa fa pele ga Jesu, Bajuta ba batla gore a konopiwe ka matlapa, re utlwa Jesu a mmolela, a re: "Le nna ga ke go atlhole. Tloga o tsamae, mme o se tlhole o leofa."

Le rona o rata go re itshwarela, o batla fela gore re ipone molato, re ikwatlhaele maleo a rona, re dumele boitshwarelo jo re bo baakanyeditsweng ke ene ka go re tshololela madi a gagwe mo sefapaanong. Bogolo go moo o na le thata go re thusa mo ditlalelong tsotlhe tse re kopanang le tsona. Fa o sa dumele mo go Jesu o tla bona thuso kae? Petoro o ne a ipolela, a re: "Morena re tla ya mo go mang? Wena o na le mafoko a botshelo jo bo sa khutleng? Mme re dumetse, re bile re itse gore ke wena Moitshepi wa Modimo," Joh. 6:68-69. Botshelo jo bo sa khutleng bo abelwa ke Morwa Modimo.

Jesu o ne a sa rate gore tiro ya gagwe e phatlalediwe mo lefatsheng lotlhe, mme batho ba ne ba sa tshegetse taolo ya gagwe, ba re: "O dirile tsotlhe sentle; o utlwisisa disuse, o buisa dimumu." Ke nnete, ga diragadiwa tse di kwadilweng ke Jesaya 35:5-6 ka gore "foo matlho a difofu a tla fufologwa, ditsebe tsa disusu di tla kabologa. Foo ditlhotsi di tla tlola jaaka tshephe. Loleme lwa semumu lo tla duduetsa." Ke nnete! Tiro ya ga Jesu ke ponatso ya gore go setse

go simolotswe sebaka sa popege ntšhwa, se se tla dirafadiwang mo go feleletseng ka letsatsi la bofelo. Ka letsatsi la katlholo go tla khutlisiwa ditlalelo tsotlhe mo go bone ba ba dumelang. Tsotlhe tse re di diretsweng ke Modimo re tshwanetse go di lebogela, le go o tumisa ka ntlha ya tsona. Mosamaria yo o neng a fodisiwa mo leperong la gagwe, fa a ne a bona gore “o fodisitswe, a bowa, a galaletsa Modimo ka lentswe le legolo. A ba a wela fa fatshe ka sefatlhego fa dinaong tsa gagwe a mo leboga; mme yoo ya bo e le Mosamaria,” Luka 17:15-16. Motho yo e neng e se Mojuta, motho wa Samaria o ne a lemoga gore ke tshwanelo gore re leboge Modimo, fa re thusiwa ke ona. Ba re itseng Modimo gantsi re palelwa ke go tumisa, le go o leboga ka ntlha ya ditshegofatso tse re tshegofadiwang ka tsona. Phuthego, a o re thuse mo masuleng otlhe, gore re se ka ra tlaselwa ka ona. Go rapela le go kopa ga rona mo go ona go ratwa ke ona ka ntlha ya ga Keresete. Ke gona re rapelang mo leineng la ga Jesu Keresete ka go gopola ka metlha gore dithapelo tsa rona di amogelwa ka ntlha ya bopelotlhomogi jwa ona fela. Fela jalo o re solofeditse gore thapelo le kopo ya rona o tla di utlwa, o di utlwa ka ntlha ya tiro ya ga Keresete yo o re baakanyeditseng tshiamelo e kgolo eo ya gore re atamele mo go Rara wa rona yo o mo legodimong mo leineng la ga Morwawe Jesu Keresete. Ke fa go dirafala gore re gomotsege, le ka go gopola mosadi yole wa Mokbanana yo o kileng a tla mo go Jesu, a utlwelwa botlhoko ke Jesu, yo o fodiseditsweng morwadie yo o neng a tshwenngwa ke modemone. Mme yole o ne a kopa, le go kopa Jesu, le fa Jesu a ne a mmolelela, a re: “Ga ke a rongwa gope, fa e se kwa dinkung tse di latlhegileng tsa ntlo ya Iseraele.’ Ke fa mosadi a tla, a mo obamela a re: ‘Morena, nthusa!’ Jesu a a raba a re: ‘Ga go a tshwanela go tsaya senkgwe sa bana ga se latlhela dintšwanyana.’” Le fa a bolelelwa lefoko le le utlwisang botlhoko mo go kalo, mme yole a mo dumelela, “a fetola a re: ‘Ee. Morena, gonne le tsona dintšwanyana di a tle di je matlhotlhora a a wang mo tafoleng ya beng ba tsona’ Foo Jesu a mo araba a re: ‘Mosadi, tumelo ya gago e kgolo! A go go dirafalele ka fa o eletsang ka teng.’ Mme morwadie a fola e sa le ka nako eo.” A re se ka ra lapa go rapela, le fa re bona gore bolwetsi ba sa tlosiwe mo go rona! A re se ka re simolola go belaela, mme re solofele, re ikanye gore bolwetsi jo bo fetang mefuta-futa yotlhe ya malwetsi, e bong jwa maleo a rona, Jesu o a sikare yotlhe gore go phimolwe melato yotlhe ya rona, o re solofeditse jalo mo kolobetsong, o a re laletsa gore re nwe madi a gagwe a re a tshololelwang go nna boitshwarelo jwa dibe mo selalelong sa gagwe. A re se ka ra belaela tsholofetso eo, mme re itumelele tsholofetso eo ya ga Keresete. Amen.

9. Thapelo: MORENA o kgatlhwa ke ba ba mmoifang, ba ba solofetseng bopelonomi jwa gagwe, Jerušalema, galaletsa MORENA; Sione, baka Modimo wa gago,” Pes. 147:11-12. Amen.

Thapelo ya Morena: Rara wa rona yo o mo legodimong ...

10. Sefela sa 239 - 224/232

A kagiso ya Modimo e e fetang tthaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. Mkhabela, ka ngwaga wa 2015.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.